

# Bedankt

## Un wat können de Borkumers moij singen

**BORKUM**/jan - As dat dodstille is in't Dörp un ji Menschenkinder gahn na de Olde Toorn, eijen hum ein bitje over de folderge Huut un lüstern, dann kann dat wall angahn, dat ji ein paar Woorden hören. So was dat uk ehrgüstern nacht un dat klung haast so:

„Börkers van Borkum! Anderlessens was ik noch ein bitje an't dusken, daar was mi, as off eine bi mien Tönen satt tau knibblen. Sull d'r eine mien Liekdoorns begahn? Ik keek na benenden un under mi up de Olde Karkhoff was ein Heer mit büllten Krullen up de Kopp un noch dreej andere Mannlü an't graben un an't daun. Wat sall dat?, hebb ik fragt. Man seej wassen so ieweg an de Gang un hebben mi neit verstahn. Ein Sett later hungen de Froulü un Mannlü van de Vörstand ut de Heimatverein over de Müre tau neejsgieren. Seej wassen düchdeg an kakeln un dann kwamm ik d'r achter: Seej wullen weiten, wat under de Grund is, waar dej olde Karcken wassen un is vör mien Tied - ik bin Michaelis 1576 upstahn, dat is ein heile Sett her - uk all wat west. Hebben vör Fievtienhundert all Mensken up disse lüttje Sandbülle leevt?

Dat willn seej weiten, de Utgrabers van de oostfreiske Landskup un de Heimatverein. Bit nu hebben seej ja uk all

ein heile Bülle funnen, Steinen, Knaken un staffolde Münzen. Gaht man driest hen, hier was frauger de Midde van't Dörp, haast de Naffel van Borkum. Later kwamm mi ein lecker Rök ut Toornhuske in de Nöse. De Wichter wassen an't Waweltjes backen un hebben de Brann dewien mit Rosinen ansett. Dat is dat erste Teiken dat Stratenfesche kummt. Un so was't uk. Ik hebb d'r alltied Aregkeit an, dej völe Lü tau beluren, hau seej mit Eten un Drinken, mit Spölen un ander Wesewark Borkum up't Beste präsentiern. Un wat können de Borkumers moij singen. Neit bloot dej Klöttjes up de Plaatze vör de Skaule, uk in de Hauk bi de reformeierde Karke. Karaoke neumt man dat. Heerlek, hau Groot un Lüttjet, junge un oldere Damen un Heeren hör Talent wiesen. Best gaud un dat Koppel van Volk draumtau was düchdeg an Handjeklappen. Un dat Upskieren maandag mörgen - na ein lecker Frühstück mitnander - leip uk mit. Middags kunn man weer van de Deelee slicken. Kann wiss keine over moppern.

Was weer heil moij dat Stratenfesche dit Jahr. Moje Bilder bin uk in't Internet tau bekieken, hett de Baas van de Heimatverein seggt, under Heimatverein-Borkum. För jau Wark un Moite, all mitnander, weest bedankt.